

四庫全書

集部

欽定四庫全書

集部

紫微集卷八

五至

詳校官庶吉士臣瑚圖禮

主事臣呂雲棟覆勘

纂錄監生臣龍舜耕

欽定四庫全書

紫微集卷五

宋 張嶠 撰

七言古詩

行建溪上是晚同宿小橋感懷書事

上庸亂石滿微水建平孤嶼橫中流驚濤穹隆旋雲繞  
經過親見客沉舟建溪物色兩相似使我惻貯悲西州  
閩中窮臘春欲動陳亥已見新萌抽十尋嶺樹森翠葆  
百尺瀑泉垂素虬已遭霜露感人意况復梅花欺客愁

沙村叫渡日色晚野店投宿林燈幽語言不通費辨數  
逆旅主人才見留十年敵騎遍寰海北客走到天南陬  
天高地迥豈不廣南來北去皆離憂傳聞敵騎又深入  
旃毳欲臨瓜步洲吁嗟華夏半為鬼干戈喋血衝斗牛  
天公亦宜小解事號令一使災禍瘳剷除撓槍殪旬始  
彎弓一矢摧旄頭擢寇之筋洒寇血永使萬國無戈矛  
山清海晏氛祲息地闢天開宗社休黃屋却臨天北極  
紫壇復在郊南丘千官濟濟奉宸宸萬姓蠢蠢蒙皇猷

六營健兒易驅使四海黎庶依田疇老夫漸得反閭里  
汎掃墳墓栽松楸洗耳不聞兵革事畢命邱樊何怨尤  
願言祇恐未成遂作客蹉跎霜鬢秋

題均州超然亭

君不見綿州官府誠磊落越王樓觀翔寥廓又不見昔  
日荊州分上游舉世獨傳王粲樓最然土木何足數託  
名勝士真難休何年此地有新構楊公巧智人誰侔芟  
夷荒穢走狐鼠一朝翼瓦飛城頭軒窓四面瞰木杪下

顧衆宇如敦丘卓然獨立世塵外高視物表心夷猶西  
山列翠擁雲嶠漢水拽練縈寒流江楓染絳照林莽蘆  
花吐雪連滄洲秋高盡放遠山出點綴天宇濃眉修人  
間何處有此景未識黃樓如此否楊公舉世稱賢侯好  
客不減韓荊州仁風惠政已及物退公餘事歸觥籌我  
來正值秋節晚勝槩一得從公遊敢辭山路困行役小  
舸艤岸聊淹留劇談抵掌去苛禮賓幙主人交獻酬固  
知如此興不淺大白豈惜為公浮却思賓散城烏集回

首新亭風景愁聊攄累句寫清賞作賦能事遲曹劉

過屈平昭君故宅

夔州之山皆入雲夔女寢陋男不文山川歷歷應如舊  
昭君屈平猶荒村三百篇後無繼者始作離騷紹風雅  
君門九重難叩閭欲登閭風聊蹠馬精衷寫盡君不聞  
徒倚懷沙淚盈把漢家靡曼盈六宮明妃容與如春風  
琵琶何能慰行路檻檻羶車隨去鴻椒蘭得得在修門  
獨任先生作放臣妃嬪無數貯金屋祗遣王嫱犯塞塵

萬古江山虛秀氣二人賢色皆鍾美天之生此諒應難  
一棄單于一沈水遠色蒼蒼難致極弔古徘徊淚霑臆  
二宅遺基自古存石巖天深秋日昏滄波渺渺流遺恨  
後人誰為賡天問

閩中早春

愁見繁雲帖死灰驟喜春從天際回晴雲流爛滿峰起  
激灩陂塘泉脉來春歸欲驗將何許柳腰杏頰知春處  
出門矯首望四郊滿目都無故園樹暖景猶疑是故園



紛紅糝白終蕭然黃茅不受春色染化工無地施妖妍  
老夫此時三歎息晴靄暄風總輕擲緣岡繞澗試幽尋  
好鳥一聲山桂碧却憶當年漢水邊花光柳色媚晴天  
江頭醉罷日將落芊眠草色生長煙祇今春事知何有  
傷心萬里空回首中原但有骨如麻杜曲應無花似酒  
我今流落荒山隈秋蓬作鬢心催頽逢花政恐被花惱  
幸茲寂寞無狂媒閉門睡足高春後爐煙一炷消清晝

欲雪

欲雪未雪天糶糊凍行沙尾鷓鴣呼北風刮耳立不住  
更騎鈍馬穿枯蘆兩生憐我意不舒江頭三日占檣烏  
高堂明朝置安輿買羊沽酒償勤劬

吳宮詞

新粧間花光口脂雜藥氣相對兩生春停杯自成醉高  
歌白苧舞西施半夜雨來宮錦移明日重來歌舞地宮  
水浮花繞宮樹

翟方進

相君事郡當少時見謂遲鈍遭謾欺一從蔡叟問所適  
羈遊萬里來京師從馮老姥織屨賣學問聲名從此大  
胡常初毀更見譽一日超升登掾宰男兒立身要自勵  
旬歲連摧兩司隸薛公視遇不敢輕果見登遷居相位  
徒知得意快恩讎峻文未肯持平例九卿先達故郡歸  
紅陽貴倨猶奪氣忽聞當坐定陵事慙懼乞骸更見慰  
深窮黨友圖自安十有九人同免官得君萬事無不可  
解使衆醜成妖嫻一朝天文示變異李尋奏記翩然至

養牛尊酒天上來萬歲之期何可避使人致命忽馳去  
半道尚書言物故十年寵貴一日空徒見縞衣蒙檻柱  
誰云蓋棺事則已下流衆怨何能止芋魁飯豆亦云足  
至今鴻隙歌鴻鵠

仲冬冬至後

仲冬冬至後春從九地回去年逢春在此寺今年復向  
此寺逢春來春去無復見花草但有東風刮地如驚雷  
人生七十能幾時四度逢春祇在斯祠官不復更述代

直若倉庾氏久任無年期大農賦祿隨官品豐儉由來  
皆有分空儘天年在世間飢飽死生皆不問癯老非才  
固應爾豪俊當年亦為此謂非貶謫實累囚謂是歸田  
猶祿仕憶昔漢唐與本朝咸有自新及起廢如今豈無  
大眚及溥天不在他時洒心例人生如寓年年老歲歲  
彫零人漸少莫嫌四見魏唐春尚得逢春到華皓祠官  
之設自何時聞是元豐宰相之所為欲擯老成皆不用  
託於優假創斯規當時弊政出一切豈謂瘡痍後世遺

專寵持權事雖巧榮華寧得多時好君不見金陵零落  
故相家一如寂寞韶陽廟

覺道同翫梅

雪盡徑泥乾團藥遶樹看玉梅呈素艷霜重月華寒一  
萼半含春意密數苞未破臘脂粒斜枝倒浸碧池深羅  
衣暗惹香風濕須知賈午最多情繡囊偷佩芳筵驚又  
疑仙人下姑射玉容寂寞幽態清去年梅花開干戈猶  
未掃今年梅花開勸君休草草莫待子規啼梅花滿地

蝴蝶飛

約人泛舟

前旬小雨飛廉纖今旬夜雨聲滿簷高原草青花欲消  
幽人意與春蕭條四山不復見桃李開到梨花春有幾  
似聞城下野水生正好浮舟煙雨裏

崇山圖七賢詩

題輿意近崇崖圖魯侯為賦溪隱詩長松短壑歷可數  
坐使妙境移于斯地靈神秀天所秘豺嗥虺伏鬼莫窺

芟蓬扶翳快登覽若有異物陰相之嵌巖截辟臨漢許  
左拱右揖如追隨七峯遠峙攢劒直三溪旁繚紫帶垂  
芳洲蘭杜飛白鷺滄浪漁艇牽釣絲煙霏露融水鑑淨  
一聲孤笛橫雲霓淑氣亭亭掃般若昂精燦燦棲明祠  
幽尋眼力覩大巧卜築得此林巒竒堂如連艦岸若玦  
呀成空谷窪為池妙觀觀盡見覺性靜隱隱德騰光輝  
信美誰謂非雲土致爽自足和天倪鄧公之孫特不凡  
渥洼繡韉黃金羈曾中萬頃九雲夢江湖寬曠貞以期



入峽詩并序

建炎三年八月初一日自百合口泛舟順流歸竹山  
是日午過蒲溪中流望微王山嶄然出雲氣外舟行  
踰十里江勢百折而茲山常在岸傍行未幾山益峻  
水益陘草樹變鬱舟人曰將入峽矣謂載人無譁或  
有老獼猴從山頂墮飛石也峽口兩山皆自水中拔  
起數百仞壁立如削巖石竒詭無圭撮土諦觀初若  
一山類有物中斷之今水流其間者兩山之間相去

不十丈自始入至出闊陁若一如有意而為之者樹  
從山石上生色紺綠異於凡時有絳葉飛墮洄潭中  
恍然非塵世有也船少轉水齧山足且數丈從石下  
過舟有大龕若十數楹屋水洶洶出龕壁後土人名  
曰魚陀云每以歲三二月有魚數萬觔自陀中出不  
知其潛通何許也魚陀不下數舉權有洞在山腹去  
水面數十丈斬絕不可至土人攬蔓而上持火入洞  
中行三丈餘不敢復前意其有神仙或蛟龍居之惜

舟過時日已晚不得一窺洞口也俄而山漸低水增  
闊波濤復湧汨於亂石間湏臾已出峽矣大抵自穰  
谷口而上至微水發源處土人均謂之峽江而自上  
而下者過微王山下長灘為入峽自下而上者過穰  
谷上九澗洞為入峽峽江大抵多湍瀨客過而覆舟  
者十二三而峽中獨無有水安流若鏡萬象墮水中  
毫髮可了仰視天正碧如疋練掛峯頂間是時秋已  
中山間高爽如平地重陽時微陽被巖岫衆形鮮潔

秋蟬噉噉鳴樹間使人殆有遙舉意但恨茲役也本  
以避地來往不專為游山行故峽中之景尚有遺不  
錄者然使僕也向非避地又焉能冒絕險而為此行  
也哉故記其畧以遺世之未游者云

微王大峽何崢嶸疊嶂層巒礙飛鳥石壁排空何可鑿  
拽雲蒸霧無昏曉凝思天地始胚胎清川一道何從來  
聯峰既非巨靈擘絕岸不聞神禹開兩山中斷緣何許  
異事人傳向開府鑿石穿雲神鬼愁至今行跡行人覩

從此奔流出亂山東匯沮漳入荆楚鱗鱗山樹經寒碧  
枝侵雨露根連石境勝應來仙馭遊巖深定有蛟龍宅  
君侯事跡已煙沉流水年年石上深山川不改時代積  
徒使人興萬古心土人事神何敢侮桂酒春秋荐椒糝  
衍衍巫歌神降時森森廟樹來風雨

乘舟阻風

澤國天低星斗濕疾風吹波作山立岸頭草木皆震動  
雞犬鳴吠紛相及通宵萬竅無停聲平明更作春濤驚

青天東下日杲杲風伯盛怒何當平人言航河只一葦  
咫尺猶須論萬里乃知世事不可期指點舟人轉船尾  
常悲無梁越長川我今操舟翻百難平生所遇半如許  
豈獨此事堪長歎吁嗟屏翳真可鄙歲歲祠官費秩禮  
我聞敵騎南渡年萬里長江波不起

西谷歌

西谷崖壁挺拔雲林深密惜其不到也猶意其有  
隱者焉慨然有結茅之興戲作西谷歌以寄意云

西川峯嶺皆綿延一峯突兀如青蓮崔嵬勢壓東南倒  
穹崇下俯羣峰小古木陰森寒未凋長雲慘澹晴猶繞  
陰巖積雪溜輕冰南嶺驚春轉幽鳥山西有谷聞深曲  
中有人家在山麓書掩柴荆雞犬閒歲耕煙岫困倉足  
巫山岷嶺遙相連知是層城幾洞天避世秦人應綠髮  
茹芝仙子好朱顏寰區喪亂方如許寸地尺天無安堵  
我欲攜家住此山高謝時人出塵土女蘿薜荔結為衣  
文杏香茅緝為宇滿谷栽松紫翠寒漫山種杏蘋霞吐

朝尋石乳丹洞深暮斲茯苓蒼檜古山中父老志斯言  
他時來訪吹笙侶

喜雨行

歲星運行至荒落鷄尾初占建魁杓大旱金石皆流爍  
旱魃何知恣為虐大田多稼三百廩盡是農夫耦十千  
一朝焦枯如束管赤地百里焚則烟官長視民如視子  
常恐歲饑為殛死並走羣望嚴神祀却蓋斥肩昭勤止  
至誠果能格明神明神為公訴蒼旻蒼旻油然興濃雲



濃雲鬱興雨如霖農家不傘走溝遂抖擻偃木無生意  
詰朝犯曉細原本缺  
二字縷縷青黃交穎穗農人以手加額頭  
使我不死賴宋侯白老垂髻聲呦呦優游咸歌脫窮愁  
陵山攢空插蒼玉舒水拖絹浸寒綠山高水長歲月續  
德我宋侯歌不足

贈趙公旦

少年意氣隘九州遠別不為兒女愁  
祇今摧頽落異縣跼步信宿生離憂  
况今送子又千里使我別緒何能休

憶昔石城初識面兩髦紛幘君纔收余方弱冠事科舉  
竝轡共適東西州春風尋勝襄傍寺夜月復登臨漢樓  
鳳林花開無遠近漁梁柳暗迷汀洲荆門至陋不足數  
杏山百丈清泉幽徑過物色盡可記至今夜夢當時遊  
從茲一別星再終相望不啻馬牛風臨安相見各驚歎  
君非丁壯子老翁長離更挾鷓鴣至射策同攀却詵桂  
上書不肯干相公頰首甘為州縣吏故人義重非時俗  
三程過我荒村寺歡言不覺春夜闌破月已上前林端

一杯相屬且自適莫話舊遊成慨歎聞君早有求田約  
四方寧有襄陽樂時平我則徑西歸遠追高士鹿門期  
贈黃子真

再作醉李客四年兩相從當時江頭樹又暗行李中嗟  
君事業誠有餘十年客路常崎嶇祇應未識今傑士懷  
刺試謁劉南徐

種植詩

魏塘草樹環佛宮兩春不識花白紅但有柳絮迷晴空

今年始種木芙蓉間以寒菊助丰容  
新栽黃葵已蒙茸坐待沆寥秋色  
濃鞠衣仙人來御風似聞芍藥富  
紅紫願分餘波作春事要令睡眠  
迷絀綺勿言滯客無幾求將致來  
禽及青李

蔓菁花詩

遊絲百尺如堪挽小蟲羣飛欣日暖  
蒿萊滿地不見春唯有蔓菁迷病眼  
無復陵陂間碎金青苔漫想玄都觀  
今朝幸值天無風飛來雌蝶畏雄蜂  
村中女兒將挿鬢

不信河陽萬樹紅  
幽人惜春春已遠  
把酒屬君君自遣  
蔓菁開花猶爛熳  
君不見西園桃李能幾時  
此輩天教擅春晚

寒食行

寒食祠墳由來已久  
亂離後每經此節  
孝子仁人孺  
慕感傷可勝言  
耶因作寒食行以叙其痛苦之意云  
寒食由來古今重  
四海人人作丘壠  
兩京道上松柏多  
盡是王公大家塚  
伊昔年年當此時  
鈿車寶馬相追隨

紛紛錦樹滿原野暖風遲日爭光輝草間燒紙樹間哭  
羅列杯盤烏攫肉侵晨祭罷薄暮歸旋風剪剪吹餘灰  
爾時馬醫夏畦鬼亦受子孫追養禮豐薄由來稱有無  
咸具盤餐致醪醴家家丘墳各為主何人壠上無新土  
自從遭亂去鄉關幾歲松楸不曾覩况復其間多發掘  
孝子慈孫淚如雨流落他州遇火前去年如此復今年  
新阡舊壠祇回首無復原頭掛紙錢君不見東都之傍  
永安道車轍平生生碧草四時祠祭今寂然五陵春樹

生蒼烟

秋暑

涉旬秋暑不可觸髮踈被汗如膏沐忽然三日風撼山  
冬裘未具膚生粟去年登高作重九黃菊未開新酒熟  
今年無酒不登高獨行漫繞庭邊菊中原季月欲折膠  
江界隕霜無脫木擁鼻從今四序移遮眼殘書豈真讀

夏致宏方城道中以詩見寄避地窮山秋雨仍

作因次其韻

柴門直面排青壁山木凋霜疎寂歷西風吹雨衆山昏  
聲落茅簷斷還滴每讀離騷傷遠遊一為遷客又經秋  
四時代謝不停軌激江萬古長悠悠丹楓蕙葉照巖壑  
物態故欲增繁憂詩成滿岫濕煙起寸心折盡空搔頭



欽定四庫全書

紫微集卷六

宋 張嶠 撰

五言律詩

春日

老去仍羈旅逢春非我春  
物華隨意別感慨與時新  
柳重將迎客花然似笑人  
十年憂國淚依舊洒衣巾

七月二十四日山中已寒二十九日處暑

塵世未徂暑山中今授衣  
露蟬聲漸咽秋日景初微  
四

海猶多壘餘生久息機  
漂流空老大萬事與心違

病中夜雨

新涼增客意卧病復踰時  
雨脚夜深白蟲聲秋後悲  
高  
低山樹立迢遞曉鐘遲  
此夕天涯鬢知添幾縷絲

忽見早梅

積雪凝閩嶺凌風識暗香  
疎花經雨瘦卧影入溪長  
萬  
里難為贈九回空繞腸  
綠原聊駐屐試待月荒涼

坐聽啼鳥如春禽響信筆書

閩山冬候暖寒鳥似春禽一聽間關語偏傷羈寓心雨  
霑陳葉盡雲壓暮山深坐久疎鐘歇餘聲過遠林

次韻子直二首

南北半程雲澄江對華門未能操井臼試學牧雞豚智

勇懷三傑英雄鄙二袁男兒須報主未用反招魂

昔屈原宋

玉作招魂大招其意以既遭放逐欲復歸故都以相其君而唐皮日休以忠故不如介死故作反招魂

曠朗秋天迴嶺雲依樹消飛飛歸鳥急去去廣川遙鴻

鵠本難畜松筠常後凋誰為招隱賦歲暮獨難聊

思玄賦云

起鬱悒  
其難聊

次韻朱希真二首

東觀曾同入南宮復鴈行嘗寮雖具爾投分獨難忘  
榮悴無多異漂零共一鄉遙欣訪蕭寺顛倒曳衣裳

禪榻仍兼卧蒲團穩著綿自疑方外客猶費縣官錢  
意懶如聞道身閒似得仙何當集蘭若已辦泛湖船

再次韻寄朱希真

一舍徒相望書來祇細行野梅行欲盡幽興詎能忘  
老

去尤耽句春來更憶鄉  
看看過寒食北望一霑裳  
初喜花明炬還愁柳墮綿  
時須盃裏物聊費杖頭錢  
天上足官府人間有地仙  
却慚營道嬾渾似逆風船

次韻周守二首

西川方用武憂思惔如焚  
秋興悲黃葉閒情屬野雲  
鳴鴻何日到絡緯不堪聞  
每憶盈尊酒清談從使君

秋色際遙海乘高傷遠眸  
風塵方未艾身世豈勝愁  
黃

菊已過晚濁醪徒滿甌  
何時奉松原本一醉碧溪頭

缺

次韻周子直四首

寰宇安危異乾坤歲序同  
投身雲嶠碧落膽戰塵紅  
晉馬成南渡宗周入國風  
操戈誰衛社羣盜正爭雄

西北壇途感東南信未通  
小夫方自智大將莫論功  
敵馬來關外油幢入閩中  
孤臣難自力報國意無窮

原本樊多勝日杖屨偶相同  
西嶺輕陰結東山落照紅  
葵傾終向日蒲弱易含風  
甘作囚山柳休為投閣雄

淵明門謾設仲蔚徑才通用  
世慙無術哦詩喜有功  
舊

廬羣盜裏北闕戰塵中塞路多豺虎吾生信自窮

又次韻四首

長夏林泉好還欣觴羽同顛毛愁裏白顴頰醉來紅日  
蹇嗟南國民離歎北風當塗寧市駿俗眼競嘲雄

異世如張贄深居似敬通致身寧有意覓句恐無功世  
事忘言外羣情一笑中詩書猶可詠吾道未終窮

臨流清滄暑薄暮一尊同林葉風翻白山梅雨漬紅鷺  
魂須楚些繕性賴真風舊學嗟荒落新詩識渾雄

篇章雖漫往悃幅詎能通待子應無恙臨池定有功綺  
疏羣木杪倒影亂流中何日陪康樂登臨興未窮

山中月夜

過雨得清夜月明惟水聲葉光知露墮蘭馥賴風清天  
地未悔禍豺狼猶阻兵故園同此夕長望一霑纓

雨霽獨夜

繁星凝夜氣黑月惟西山一室空林迴逾知天地寬葉  
乾風有韻石亂水多湍獨坐澄諸念憂來信有端



今春花卉盛時黃霧連十餘日不解久不作詩

偶成

病覺詩思竭年華奈若何亂花欺客恨黃霧作春魔地  
僻交遊絕庭空鳥雀多亂離從節變不復嘆蹉跎

郡樓對雨和周守韻二首

蒼煙迷野色林谷尚微分暮雨已吹幔層巖猶出雲晚  
風時斷續落葉自繽紛寂寞窮山裏何堪入夜聞

暮雨昏平遠南山漸不分濛濛連楚塞細細濕行雲從

宦成羈束登危厭糾紛何時疎竹裏還向舊山聞

桃花塢

三吳皆白水處處祇橫舟獨有桃花塢光風盡日留一朝山雨過忽見夏陰稠詎昔繁華晚徒嗟歲月遒

褒城縣雨中

嶺雲方笠覆簷雨已盈傾山氣晝侵慢灘聲夜入城子真空舊隱褒似謾垂名訪古多磨滅秋風山樹禎

縣有漢王

城沔水今皆湮滅

夢中作得六句覺後足成

山中茅屋好况復竹籬新一逕往來客萬山迎送人葉  
殷渾欲染冬暖却疑春近得幽棲地時來岸角中

秋日懷古園有作

故里田廬遠他鄉禾黍秋風高初下葉川淺欲生洲月  
出空山靜煙生遠樹稠已諳為客意堅坐任遲留

途中偶成寄幕下諸公

曠朗高天淨蟬鳴江漢秋川晴山厯厯身遠意悠悠落

日慘行子長風欺弊裘  
郡樓今夜月應從庾公游

秋懷

忽忽經年事悠悠  
滯客心晚花生廢圃  
老樹立秋陰豈有清樽  
醉寧辭白髮侵樓高  
見豪髮老大怯登臨

望瞿塘峽

萬古瞿塘峽猶存  
禹鑿痕岷峨驅衆水  
灑灑沒孤根雲黑樹  
含雨祠荒鴉噪昏  
悲涼灑西地三嘆相營魂

入瞿塘峽

瞿塘深窈窕翠氣曉空濛亂石增驚浪長灘激迅風舟  
行天漸內身在夾城中絕壁皆侵漢于茲識禹功

贈黃子真

江漢知名士石城黃子真殷勤能過我坎壈歎斯人此  
去仍為客舟行任過春無資振遊舊懷抱不能伸

送賀子忱漕閩

上蔡舊名士中臺令望郎行馳封傳寵路向七閩長山  
水聞清遠官曹試暇皇遙憐荔枝熟虛館進風涼

送許子禮漕湖南

為郎端有望漕務復需能湖外頻無歲漢傍連有興足  
兵先一飽化俗遲三登時到湘西寺高臺得暫憑

雨後望雲

歲序屬殘臘雲容先發春氛氲迎近壑亂髮靄遙津暮  
色含微雨林滋被細筠憂居時物變有淚洒蒼旻

立春後一日偶書

薄暮春風惡黃塵漲遠山冥冥林靄變冉冉鳥飛還作

客信多畏依人足強顏飄揚它日意回首鬢毛斑

偶成寄致宏

為問邊城客經春復若何孤生寬意少游子苦顏多青  
壁題詩處澄潭載酒過塞垣風色惡應憶舊雲蘿

山前紅葉

前山風落木俯檻愛爛斑凌曉千花麗經旬萬炬閒詞  
人歌火織巴客訝燒山不似庭花艷開時瞬息間

贈相僧楊懶散

邂逅湖傍寺翻然還語離春風飛錫遠暮雨渡杯遲渺  
渺孤雲意翩翩野鶴姿百年堪幾別何處重相期

戲呈覺老

投曉過書齋風門自閉開雲容疑水墨雪意吝瓊瑰筆  
冷吟呵凍爐寒坐畫灰何如氍帳下低唱兩三杯

清明

園幽春去遠山暗綠初成雨過林姿潤風回池面平十  
年空潦倒萬里近清明淚盡新阡樹如今青葉生



獨夜

清燈蕭寺遠不寐夜何長  
風細頻翻葉雲輕才護霜  
磴黑水泱泱月明山蒼蒼  
作客歲月晚故園春欲芳

苦熱

三吳多異候瘴癘日愁予  
夏日雖可畏清風非糝如  
殘春且重繭徂暑但深居  
凍飲清涼耐由來未可儲

送趙公望入蜀

異世黃叔度宗支劉辟疆  
相看不覺厭此別詎能忘  
四

海兵戈滿山川道路長去留無上策分手鬢毛蒼

秋日晚出郡郊

暝色生平野喬林動遠風蟲鳴古道迴月白戍樓空歲  
月悲歡異山川今古同荒城見搖落未免泣途窮

寓居

是處為家得斯居亦漫成西齋便靜密小閣更深明送  
老一床足遺形百慮輕傍人訝幽僻端可寄餘生

和周守登樓對雪

寒風動原野密雪度層軒素積長郊色青餘遠岫痕輕  
冰幽沼合棲鳥暮叢喧邊騎暗河洛應無閉戶表  
風積同雲凝飛花際八寰碧流連遠水玉立認羣山戎  
馬逾猖獗生民政險艱兔園歌吹地回望損朱顏

余於六月初三日泛舟至奇石洞留題洞中一

首

世人應未到若士或曾遊岸隔千峰秀門臨萬瀨愁蜺  
旌疑可遲丹洞擬深投歸去誇塵侶城闈鶴暫留

賦得山上樹

鬱鬱復蒼蒼，扶疎翻曉光。  
豈能偏雨露，祇益早風霜。  
蕭瑟秋將暮，紛披葉盡黃。  
深溪調鼎樹，歲晚獨能芳。

遊北巖

尋山輕近境，偶向此中來。  
精舍層巖擁，宮林石路開。  
排雲今歲竹，封徑幾年苔。  
僧老無餘事，端居傲劫灰。

往年沿檄金州謁，女媧神祠是時猶未亂也。  
紹興壬子挈家避地三巴，後過祠下登山椒以望。

江漢自是故園懸隔矣

七年如轉首復過此山頭閱世興衰異傷時涕淚流嗟  
無補天手豈有去鄉愁漸覺山河異憑高更少留

次韻太守會宜休亭二首

屐齒破苔色林塘欣共尋水光連竹塢山翠上衣襟  
柳搖斜日高梧轉晚陰  
媿偶休入詠可怕兕觥深

萬竹鏤深翠幽亭枕柳塘共臨朱檻坐遙借渚蘋香烏  
喜樹陰密魚遊荷影涼聊從山簡醉疎逸興何長

喜晴

一春黃霧暗，今旦始清林。  
姿明積雨水，色澹初晴好。  
鳥關關，轉新泉，泱泱鳴前山。  
有佳色，聊以駐幽情。

登寺閣見月上率然成詠

殘陽猶半谷，片月已臨山。  
暮色千林起，鄉心萬里還。  
不堪常俯仰，寧有但間關。  
絕世非吾意，幽棲寄暫閒。

九日

重陽述令序，景物自為嘉。  
易辨如江酒，難浮似粟花。  
追

遊疑所務寄興眇無涯  
舊俗臺應廢何人杖馬馮  
九日空山裏乘高感歲華  
霜風翻絳葉晴日亂黃花  
積雨饒新徑荒林足亂雅  
連年頻避地憔悴客田家

歸日再過分水嶺

茲山已巉絕盤道乏縈迴  
路向日邊出人從雲外來  
澗聲高更咽梅蘂雪猶開  
却憶僧房坐深爐擁細灰

金州行衙

城頭翻鼓罷庭樹晚風愁  
破隙華星大當簷素月流  
灘

聲侵夜急江霧入城浮此夕天涯客何心倚戍樓

舟行書所見

津木始凋霜溪梅已飄素河山自殊方景物宛如故悠  
悠川陸行日日年華度遷客未停舟江烟欲成暮

寄題友人小軒

簪組豈為累悠然塵事微看山心自適閉戶客來稀流  
水三吳大清霜衆卉腓何由納芒履一為歎荆扉

山中



深夏遠林黑溶溶雲動山晚川澄衆影霽色潤層巒地  
靜知秋至衣輕覺暑闌居山非有意偶托即身安

興州道中遇雨

非千秋色苦客意自蕭條谷口玄雲惡關門白露高泥  
塗連遠驛寒雨暗長郊誰念征衣薄西風方怒號

通惠泉

東西幾山隔石徑不容車那知厚地底自然成井渠甘  
餘留齒頰清足鑿眉鬚不用瓶壘貯累累似酒酌

井渠事見

西漢溝  
漁志

寄題江月亭

暮氣集江縣，斯亭發興深。  
憑欄看巴水，見月過東岑。  
淺瀨金蛇動，澄潭白壁沉。  
天邊未歸客，折盡此時心。

即事

落日邊書急，秋風戰鼓多。  
私憂真過計，長算合如何。  
盡欲清淮戍，仍收瀚海波。  
棲遲一尊酒，幽恨滿關河。

九月十四日登崇山晚歸

陽精天際滅暮色望中生嵐氣侵衣薄山風墮葉輕林  
空霜月迴沙白夜江明雲裏相呼鴈翩翩尚遠征

初春

原野土膏動懷生各自欣老年歡緒少獻歲物華新草  
木涵時澤江湖寄病身百年都幾日四見魏塘春

次韻周守遊海棠溪

浣紗何處是空翠隔崔嵬嫩綠連山暗妖紅照水開惜  
春嗟婉婉載酒約徘徊莫怪臙脂濕曾經夜雨來

窮居暑雨

空庭滿積雨竟日看圓紋未厭草木歲不堪蛙黽喧奔  
流遥澗水亂上前峯雲境靜悟諸幻泊然遺世紛

泊然一作然

蕭然

陳叅政挽詩三首

今古雖同盡存亡惕遽分人誰為為善天不右斯文莫  
遂三年築空悲四尺墳音塵竟何所俯仰嘆蒿焄

脫屣違人代振容即路岐名流祠洗馬白旒痛元規一

代風流盡千年翰墨垂傷心墓前水故作夜深悲  
徒知天可恃豈謂病終侵遽使儀刑意翻成殄瘁心開  
阡賢子力卜遠外姻臨墓木看初種俄悲已茂林

劉忠顯挽詞并序

竊以忠顯公之高節令名冠於今世追配古人天下  
之士欽威靈仰光耀之日久矣某幸以賓客之末游  
寶學公之門因得進拜墳下退而作哀挽詞五首雖  
不足以佐潛德之光明然立言紀事良不愧太史公

之實錄云

黃屋辭丹闕貞臣赴敵營解言終不反先面竟如生誰  
並當時節獨流千祀名承家有賢嗣諒不愧西平

抗節羣公愧攄忠異國尊威稜千古在姦佞百年存盛  
德源流遠公朝禮物敦豐碑昭令德榮耀及來昆

天運丁陽九蒙塵事可傷羣寮徒陷敵賊子更臣張自  
古寧無死惟公獨有光向來從偽者生意日荒涼

視死如歸士捐軀徇國臣殺身雖一槩為義豈無因孔

墨休相並張南僅比倫微公今史上死節定何人  
臨難不忘死為忠已足多全生猶有路仗節竟如何可  
驗平生志宜令後世歌諸儒主褒貶毫髮未容訛

王寶學挽詞二首

德望三山重勤勞一節忠丹心明貫日英氣浩如虹趣  
召恩方急跣跌事已空功名重回首寂寞淚東風  
故相傳勲闕風流見典刑所期為旱雨何意墮明星有  
美間桴鼓姑蘇詫使亭若追甘露事忠首定丹青

劉無虞尊人挽詩

蓄德竟不耀坐觀門戶成生無三事貴祿有萬鍾榮色  
養無違志陵終若事生秋風如罔極蕭瑟在松聲

刻杖方優老臨川忽逝波登年惟載德生子舊持荷此  
日悲風樹他時廢蓼莪輻車方即路鄰杵為停歌

李廣甫挽詞

磊落生平志酣歌萬慮空名從敦樸重家為克勤豐誰  
與菜衣戲唯餘杖屨紅素車慚有阻揮淚灑霜風



鄒德久挽詞二首

萬里南來日惟君意最親  
渾如相識舊殊異白頭新一  
別遽千古九衢空萬人道鄉  
雖有子不使繼清塵

才具稱要腹奮然吞八荒  
相期終用世誰料祇為郎  
地下修文久人間逝水長  
平湖遊覽處山色舊蒼蒼

范覺民挽詞四首

射策驚寰海收名儼岱嵩  
俄從白面士遽作黑頭公  
積善齡何促流光後必豐  
他年悲宰樹獨在荆江東

舊陰交蓋處草草遂離羣何意終天別居然此地分豐  
盈宜上壽鼎盛忽西曛遙想天台路悲歎慘暮雲

有位居台鉉無年究遠猷共懷三入望忽嘆九原幽歸  
葬新阡遠追榮卹典優興衰春夢短人世諒何求  
生平輕語別徒恃接鄉閭及此悲存沒追維恨闊疎已  
聞窀穸日猶怪孟郊書宿草他年哭仍悲非故墟

陸堯夫母吳夫人挽詞

在姆母煩訓承家綽有宜辛勤當早歲宴樂近期願既

極南陝養仍深楓樹悲他年褒女史不愧管彤詩

區明風烈

昭我管彤  
范蔚宗語

### 余夫人挽詞

弱歲承蘋藻慈和內政惇辛勤立門戶壽考見曾孫寵  
秩官封貴徽音琬琰存新阡卜何許當可萬家屯



欽定四庫全書

紫微集卷七

宋 張嶽 撰

五言排律

送人赴闕

宗廟瓊璫器皇家柱石臣策名存紫府佐世值昌辰德  
懋膺宸眷才雄處要津文辭追賈馬賓望並荀陳共貴  
豐年玉帛推席上珍薦延言有味發摘政如神既畏西  
門猛兼懷鄭產仁化民幾變魯羣盜遂奔秦峻節推邦

直高風聳佞人立身惟取取讒口遂狃狃一出修門道  
重嘗未下尊豈同游澤畔詎類卧漳濱逸興傾醇耐清  
談岸角巾處屯常若泰在屈每如伸忽下泥金詔初回  
雨露春巾車趨象闕鳴玉覲楓宸江漢終歸海風花復  
墜茵途長知駮驥霜後識松筠道合明良舊恩濡寵數  
新調元歸大鼎燮理屬洪鈞賤子獨何者龍門亦有賓  
承顏常數數惠訓每諄諄屢賞王濛語寧遺趙壹貧數  
言真可誦一語足書紳他日承題品今朝冀選掄知歸如

有地拜賜遂無垠管蒯雖何用駕駘尚可馴儻能收散  
誕幸免屢逡巡悵別瞻行旆銜恩睇後塵祝公聞政日  
著意念窮鱗

題六合英氏廟

野曠煙迷縣溪湍柳繫航雉鳴初翳麥蠶長未眠桑地  
有前朝恨爐殘古廟鄉空江長漠漠寒日自荒荒竟墮  
蕭何計仍同項氏亡相黜寧作帝畫錦亦還鄉嚴瀨終  
辭漢箕山不禪唐君王千載恨行客亦淒涼

螢火

徂暑初殘夜飛螢遍曲塘  
翕張舒燭短斗注引輝長  
翻屋星移位窺簾燼吐光  
未應彌輦路聊可映書囊  
乍與風俱遠偏隨雨送涼  
老夫常作客看汝鬢毛蒼

偈冬至小雪

落葉將埋徑林寒欲刺天  
情凝遙嶺外雪墜草堂前  
竹密潛增響梅疎欲鬪妍  
紛紛迷遠樹整整度清川  
未擬乘高看惟思擁褐眠  
衡門聊騁望憔悴迫新年



七言律詩

和張簿韻

長來棲遯興偏濃  
秋日山光望欲空  
圓紋被水川涵雨  
碎影翻林樹帶風  
羣山綿亘多連峽  
微水滌洄只向東  
各有田園歸未得  
追陪強欲備鄰翁

贈江司令朝宗

投老叨恩得一州  
平生江令始從游  
揮豪坐上諤新句  
岸憤罇前傲早秋  
幸有高情能命駕  
寧能十日為吾留

詩成苦被黃花惱急送兵厨與破愁

十二月二十一日贈沃令

訟庭無事長苔衣卧聽松風白晝遲  
紙帳亂紋龜殼皴道衫深綠鶴翎垂  
塵犀揮處論前史香篆銷時理秘辭  
官長既閒春亦早玉梅初綻兩三枝

余所寓僧舍蜂筒忽散去僅留其半僧云分蜂  
時每如此尋復追求再得之貯以別龕感而成

詩

每逢晴日競飛翻忽為群居負責言甘美日充辭恭養  
蟠藏歲久念騰騫趨衙乍覺朋曹少分邑疑因支庶繁  
莫便無情同燕雀階除得食語喧喧

賀師垣賜御書一德格天之閣牌并鍍金器皿  
青羅涼繖從人紫羅衫鍍金腰帶儀物等

炎精光復論元功事業伊周信比蹤許國一心明貫日  
存孤高節凜經冬甲區地勢羅千雉奎畫天門跳六龍  
自古至誠參化育濟時行道本中庸

重屋雕甍勢欲翩  
睿題藻翰揭中天  
祗緣吉德存方寸  
迺爾叢霄格大圓  
傳自孔門皆一道  
稽諸說命合三篇  
中興如問君臣美  
萬世昭時六字傳

柳絲搖曳拂堤沙  
瑞氣中藏上相家  
風動五雲迷御俎  
香從雙闕賜天花  
仙韶合奏塵飛盡  
中使宣斟日未斜  
既醉太平誰事業  
為傾恩意入流霞

恩詔新頒導從儀  
夾塗無復走烏衣  
競紆紫霧更袍色  
仍有黃金上帶圍  
翠幘翩翻風易暖  
雕檠璀璨日爭輝

沙堤矚目人人說小相行看接軫歸

遊嶽麓寺三首

平生耳裏湘西寺此日真成叩梵宮地闢晉朝多勝概  
人師支遁有高風身遊大士毗耶境目盡湘東返照中  
佳處未能頻駐屣此行尋勝亦怱怱

杖策松門興未窮更過金地雨花中山泉浙漑通幽戶  
林葉蕭森下晚風目極平臯方蒼莽烟深城郭自空濛  
他年襍被僧房宿聊與支郎話色空

林壑盤紆松徑深華臺暇日暫登臨雲開楚岫千重出  
日落蒼梧萬里陰賈傅文章仍自昔武王城郭已非今  
傷時訪古堪流涕徒倚聊為澤畔吟

奉酬致宏贈別

強顏從宦益堪悲此日逢君異昔時末路未忘交似漆  
相看各已鬢垂絲亂來世事渾難料老去生涯詎可思  
客裏別君情更惡同歸猶恐尚差池

此生將老竟何為未信全關造物兒十載宦遊無我拙

一生懷抱有君知  
天邊故國人空老  
江畔黃花誰與期  
跨馬東歸猶是客  
離亭別酒莫盈卮

從劉待制游中梁山寺

樓閣高低跨碧空  
鱗鱗羣樹亞山風  
滄江東去流天外  
秦岫西來繞漢中  
野曠自然傷遠目  
天高聊復送飛鴻  
登臨不起河山念  
今日中原有謝公

遊道林寺詩三首

萬畦霜稻卧黃雲  
小徑縈紆接寺門  
不見高人空像設

更無衲子辯風幡樓觀遠岫秋增媚牕枕寒溪夜更喧  
他日重來瞻近影一憑香火薦蘋蘩

悠揚秋日澹岡陵繫馬喬林叩梵扃過雨溪流初瀾瀾  
無風竹影自泠泠空餘古柏庭前老依舊寒山戶外青  
惆悵祖師飛錫地巖阿誰為一鐫銘

墟落生煙晝欲昏亂山行盡到平原雨餘疊嶂添新秀  
水落寒沙見舊痕古寺有僧棲壞屋遺斜無主自荒村  
徘徊欲訪當時事黃葉驚風斷客魂



登白帝城

霜風吹日下長原  
夔子城荒灌木繁  
東去諸山朝峽口  
西來衆水會關門  
十年白帝空祠廟  
萬里家山祇夢魂  
絕塞邊頭重回首  
秋聲淒斷不堪論

殊方秋盡怯登臨  
萬里屯雲結歲陰  
崖壁崿岬知禹績  
江山割據識雄心  
滄波南下奔雲急  
單舸東遊兩鬢侵  
漂轉十方仍作客  
沉吟懷古淚沾襟

送趙郎

匡山太白書淫久不但天才蓋一時須慕更生勤博古  
莫師長吉祇為詩八埭學士多時譽七步賢王有令資  
數子風流君可致劍門他日看雄辭

亂離何處託浮生羨子今為劍外行異縣頻年多送遠  
中原何日見承平雲開壠首河山迥月出巴江閣道橫  
此別相逢定何許各須努力待時清

余於今年二月初一日夜夢中與劉彥禮兄弟  
水邊飲酒賦詩曾記所作元八句忘其餘今足

成之

夢裏相逢竟是非  
人生皆夢亦何疑  
花邊置酒行杯速  
石上聽泉得句遲  
千里幸能申闊積  
一歡何必是前期  
諦觀石火光中事  
慮不長於未覺時

舟泊宜都

二年峽內厭羈束  
此日江湖欣渺茫  
烟烟晴鷗明晚色  
悠悠殘日動波光  
遠眸盡處即他境  
疊嶂痕邊仍舊鄉  
自是望鄉須淚落  
不緣風樹使心傷

題永睦縣高齋

峇嶂寬圍巴水通  
登臨眼界浩無窮  
空蒙嵐翠雲煙外  
明滅波光樹影中  
莫詠楓林傷極目  
且依蘋末挹雄風  
中原十載人將盡  
相見休嗟似轉蓬

過鄆陽縣

孤城寂寂枕江湄  
萬室燒餘事可悲  
故老歸來泣環堵  
行人竚立問遺基  
年華祇覺凋容鬢  
花鳥何曾管亂離  
依舊漢傍春事好  
野桃開盡暖風遲

秋懷

日壓城煙光少留朝昏應似我悠悠人生百歲今已半  
世故萬端無幾求學道初聞減正受深居不賦畔牢愁  
尚須一舸輕波上自詠新詩送白頭

淞河十月菊猶斑客御貂裘未覺寒遲暮更知為客惡  
羈窮猶自借書看朔風幾夜驅鴻雁苦雨驚時損蕙蘭  
安得雀離三百尺一超紆譎破憂端

山中月夜

中原羣盜幾時平  
避地荒山萬慮驚  
霜月有情凝夜色  
溪流無盡落寒聲  
滿山林影龍蛇動  
繞屋風枝劍珮鳴  
自惜壯懷消欲盡  
只將搜句了餘生

送別

十年漂轉鬢成絲  
細話平生萬事非  
却憶青燈初罷酒  
俄聞鐵騎已成圍  
當時痛飲今誰在  
從此羈遊與願違  
客裏別君還歲晚  
江湖寥廓淚堪揮

予寓居麻子山自入冬以後大小雪凡十餘作

傳聞平地已有春意而茲山偏臘復雪寒威特  
甚

荒山絕頂受春遲幾見冰花散陸離江國疑思唯把酒  
雲林注目又成詩修篁壓路增幽意初月臨空耿素姿  
寧有扁舟可乘興柴門惆悵獨移時

雪晴

鳥鳥聲樂作初晴日到寒窗氣象新天接瓊瑤三萬頃  
樹明組練五千人已從炎海生陰翳更與神臯洗戰塵

曾侍紫宸知帝力隆興借與萬家春

小雪作

霜風一夜落寒林莽蒼雲煙結歲陰把鏡漸無勲業念  
愛山唯駐隱淪心冰花散落衡門靜黃葉飄零一徑深  
世亂身窮無可奈強將悲慨事微吟

枕上聞雪呈趙郭二公

上瑞來寧玉座憂夜聲先到竹窗幽饑腸已作來年飽  
病眼聊須臘月收高士清貧無敝履故人狂興阻扁舟



却思清曠江邊路  
鶉兔成車酒自芻

詠鶴

昂藏野鶴混羣雞  
志在雲天失路悲  
湖海稻粱元未足  
虞衡羅網莫輕施  
獨憐鍛翮垂寒雨  
可念長鳴向曉曦  
却使羣鳥驚羽翼  
上林能占主人枝

宿歸仁寺

精藍置屋切雲根  
此地何從着世紛  
縹緲僧窗更臨水  
氤氳崖樹欲參雲  
青山細認千重疊  
暮氣徐觀萬里曛

兩岸蟲鳴燈一點舟人相語夜深聞

高司業

春浮花氣擁門闌星昴神嵩瑞世間一字夢靈通洛學  
諸儒文弊隔賢關巨源淳德真金玉吏部高名信斗山  
此去致君堯舜上黑頭卿相自朱顏

旌頭落盡少微明追復成均雅頌聲詔起儒宗高一代  
禮隆師範表諸生拾遺柱史當螭立潤色綸言倚馬成  
行把荷囊多獻納要將文彩助昇平

代王侍郎送程尚書赴信州

化龍陂迥照旌旗懷玉峯高緩馬羈地接鄉關猶畫錦  
人從國老借元龜一州如斗何勞者六合同風要在茲  
此去未能溫坐席却隨春到鳳凰池

德望居朝大呂輕眷思難拂丐歸情履聲暫去端門曉  
刀夢新占虎節榮有道致君三任喜無心貪寵一麾行  
天衷祇恐思耆舊不待黃堂報政成

君王鍾意撫斯民不惜朝端屈老臣連錦麾毫千字寵

黃金橫帶萬釘珍，長安日近恩光通。  
刺史天高惠政新，我愧仙宮舊猿鶴。  
依然軒冕縛閒身。

初夏已晚山中即事

山雲倏忽自晴陰，積雨門楹蔓草侵。  
一帶清川供極目，千重沓嶂伴微吟。  
雄鳩鳴處園林密，白鳥飛來溝水深。  
麥秀桑柔夏方永，不堪時序苦侵尋。

遣興

人生何必論才良，賢否窮通脫未量。  
運否蛟龍猶躩屈。

時來鳥雀亦鷹揚  
王侯螻蟻同歸盡  
鍾鼎山林各所藏  
何用作文嗟不遇  
已將名利等蠅翔

少年豪縱志凌雲  
著論將期擬過秦  
當日詩書徒用世  
如今文字豈謀身  
亂離不用毛錐子  
漂轉聊同木偶人  
主父平生希鼎食  
年來一飽尚艱辛

三月二日奉詔赴西園曲宴席上賦呈致政開  
府太師

幅巾私第已歸休  
當寧虛懷更款留  
避寵雖辭持節冊

送行猶用濟川舟城南舊圃局花洞洛下新莊引御溝  
詔諭兩京居密邇不妨乘興往還游

邦人欽佇見儀刑詔使相望對寵靈位冠三公師尚父

劉向云師之尚之父之故謂之師尚父

躬全五福壽康寧久留行色春過

半乍別天顏涕欲零誰識上心優老意從行仍許鯉趨  
庭

昔美都門祖二疎太冲篇詠貴良圖不聞賓主俱公鼎  
未見篇章出寶跗河嶽英靈添賦咏都人士女競歡娛

皆言元老歸休盛恩禮便蕃自古無

雨中感懷

西風搖落葉聲悲避亂荒山萬緒迷一室漂搖任寒雨  
百年昏曉信鳴雞清霜已染千楓樹殺氣應隨萬馬蹄  
黃屋秋來定何許孤臣安敢恨羈栖

舟中感懷

故園此去渾如客異縣而今却是家還日簷楹應着燕  
來時楊柳未藏鷗孤舟泛泛春江闊去鳥飛飛岸樹斜

却憶當年南下日傷心泣盡日昏華

歎名

十年四海稱忠壯誰料將軍陰子謀  
舊物空餘叱撥馬  
新聲莫唱白符鳩  
民謠幾歲傳鈎落  
笙席何人戀故侯

溟海茫茫孤鳥沒一埋蓬顆便千秋

叱撥馬見李筠傳

會覽亭三首

縹緲飛亭接郡樓  
平崗絕岸對滄洲  
天邊遠岫寒無色  
城下澄江湛不流  
林影終朝垂澹瀨  
水禽隨暖弄輕浮



何時放髮從漁父會傍蒼烟卧釣舟

野岸平林對郡城登臨領要在斯亭江吞荆楚流空濶  
山入興洋翠杳冥歲晚雲煙昏近甸沙晴鷗鷺滿前汀  
杖藜竟日窮心賞猶自羈愁未肯醒

角聲嗚咽下城頭水國風煙欲暮愁遠日苦遭層嶂隔  
歸心欲逐大江流漁村積火臨沙岸賈客連檣集市樓  
千里家山一迴首林梢新月又如鉤

潭州道中

青山接雲雲接天碧林溪樹兩相鮮地連諸徼分秋色  
天近平湖識渚煙望盡好峯仍注目賞餘幽樹更垂鞭  
是身已作無貨省乘興將隨下瀨船

示疑者

天見已如摩勒果佛求休待鉢曇花萬緣畢竟歸空劫  
舉世徒勞筭海沙除幻已超白骨觀修真閒運紫河車  
時人欲識歸投處無盡光中是我家

溪梅初放

荒山犖确倦征行溪畔逢梅照眼明  
枝裊霜天寒日薄影沉碧澗晚流清  
最憐雪後開來瘦可恣風前落去輕  
却悔折歸無可贈舊遊千里但疑情

次韻石用之春晴遊西湖

春晴結客出城隅無數僧坊論給孤  
紅貼馬蹄花底路綠籠船背柳邊湖  
逍遙各自從鵬鷄斷續寧須較鶴鳧  
端立一丘為老計移文何謝北山逋

舟中即事

西來一櫂任委蛇  
春日惟增雨露悲  
故國佳辰逢禁火  
水鄉農事見扶犁  
年華祇解凋容鬢  
花鳥何曾管亂離  
目極傷心誰告語  
含毫獨賦遠遊詩

內四句犯亂後歸  
光化過鄖鄉縣篇

泊舟

遙依沙岸繫扁舟  
風落荒山萬木愁  
枕下驚波時汨汨  
天邊寒夢信悠悠  
悠悠遭憂和嶠仍  
丹淚遠適虞翻易  
白頭離亂傷人全  
策少微生從此任  
浮遊

自竹山歸鄮上墳

晨曦出沒霧交流獨喚江船立渡頭嵐光映縣民居麗  
紅葉漫山客意愁溪雲欲作今朝雨崖菊猶含舊歲秋  
此日還歸追曩事孤生淚盡黑貂裘

周叅謀以詩催再遊末章戲賦

九十日春晴幾日得堪行處便須行官因局冷常多暇  
眼到花開亦暫明當信光陰如過隙莫教風雨暗長檠  
乘陽不礙遊人路定看花驄正勒鳴

又

競說楊枝傾上國樂天題品付歌行但同學語雛鶯小  
未見回眸剪水明席舍主人能顧曲曉來粧燭想銷繁  
海棠何必尋龍井願聽周詩賦鹿鳴

喜張丞相破湖賊

遙欣丞相受降時湖外歡聲入鼓鼙十萬水軍歸禁旅  
二千里地反鋤犁弄兵無復潢池內棄甲應同熊耳齊  
從此上流無犬吠好營停障接京西

昔柳州作永州山水諸記泉石之狀如在目

前茲峽上羣山與柳州之文頗類

山礮犖确冒荒筠石溜涓涓盡日聞微水寒來渾見底  
峽山雪後欲侵雲深溪春動梅爭發絕壑林高日易曛  
應似零陵溪上景林泉多類柳州文

繼韻書胡氏孝思亭

舉世針磁覓秀峯爭從窻空問窮通喜君篤孝誠尤至  
追想慈顏事已空積毀到今猶瘠立因知卓行不雷同  
當時甘旨庭闈念應向廬前歎樹風

寓居

未有揚雄宅一區已驚短髮似盧蒲家貧粥飯隨魚鼓  
地遠賓從祇鳥鳥已罷書空為咄咄猶思快耳作嗚嗚  
衰殘政值中興日聊得安閒卧五湖

如吳興舟中讀白樂天詩有作

離離雲樹泛朝艤十月江南未變衰縱櫂千尋雪溪水  
散懷一卷樂天詩平生名宦休回顧隨分追遊且自欺  
不敢將心比餘事逍遙何似洛川時



欽定四庫全書

紫微集卷八

宋 張嶠 撰

七言律詩

新春偶書寄致宏

二年憔悴向庸城，又見椒花倏自驚。  
孤客殊方懷土意，故人絕塞未歸情。  
此生竟被儒冠誤，他日終圖後世名。  
平野春來堪細履，何時與子杖藜行。

新春有感

蕭蕭篠蕩擁荒岡却憶江皋草色長暖景暄風似春日  
黃茅白葦是殊方孤村默默無誰語萬事悠悠有底忙  
獨立寺門歸鳥盡重山複嶺又蒼蒼

上庸

天將層嶂限中原獸狀禽心類百蠻橫木架橋來渡水  
塞茅茹火去燒山尋巫問事看龜意帶穗收禾禦歲艱  
非是投荒魑魅侶時清猶賴可東還

仇氏園

泠泠竹日澹踈籬  
澹澹溪流注小池  
紅菡白蘋當夏日  
冷煙寒雨過秋時  
主人頗燕閒情適  
客子經過心事違  
行役忽忽無麗句  
漫批山水寫吾詩

和友人中秋

秋來未省舉盃頻  
却掃空山絕衆賓  
寂歷平林方隕葉  
扶疎丹桂獨生春  
天高地迥輪當午  
露白星稀夜向晨  
聞道開樽成浪語  
不妨聊作獨醒人

戲書寄夏致宏

蕭何轉漕關中日綺季逍遙商嶺時世亂或為舟楫用  
時平自可帝王師試問升車驅駟馬如何踞石茹三芝  
荒山歲暮雲煙冷西望長吟獨爾思

梅

兩京當日見初開尚想凌雲遶故臺倚竹娉姿應小駐  
高樓急管未須催傷春遠目空千里急景愁腸自九迴  
為說西園泉脉動許攜小隊探春來

荒山雪盡水生煙獨發寒英媚遠天亂蕊凝姿殘照裏

瘦松含態晚風前疑將翠袖倚修竹若獻明璫傍廣川  
喪亂自嗟容鬢改攀條三嗅惜流年

寄題清孝菴

龍山幾世閱興衰依舊春江拍岸來當代衣冠今寂寞  
百年丘隴自崔嵬簷經白日餘僧定路暗青松仍劫灰  
事去節闌春草積乘高一望獨遲回

望微水

平原莽蒼浮輕靄白晝柴門亦自扃籬外水波光滅沒

林邊山岫遠青冥如何隱几終朝看不及寒窗靜夜聽  
聽水看山朝復暮那知白髮漸星星

春陰江上偶書

小軒西下俯通津漠漠春陰日易曛白氣冒山蒸積翠  
微風過水聚輕紋城鴉飛去秋花夕溪雨收餘岸草薰  
寂寞何人念羈旅憂來無數若絲棼

登甘露寺故基

烈風吹面立城隅俯仰人間萬事徂萬古江山自雄渾

百年城郭已蕪蕪，亂餘故物惟金鼎。  
事往前賢只畫圖，雙塔烟中廣陵市。  
淮南戍守未應無。

種木芙蓉

去歲經冬百卉空，今年多種木芙蓉。  
未如蜀國城邊望，疑是秋江渡口逢。  
定之雄蜂來慰藉，應與寒菊伴丰容。  
敢同出水方新句，空自長吟負老松。

次韻石用之易安齋

塵纓脫得片時間，未見彌天釋道安。  
薜荔半崖雙屐齒。

滄浪何日一綸竿地能容膝皆堪處心對回光未易看  
試問老僧安底事不知人世有悲歡

和夏致宏詠梅

春嵐初破曉光遲青女消餘泣玉肌雪後離披憐落蕊  
溪旁婉約愛橫枝不隨姑射乘風去定與飛仙待月期  
山靜林深香暗度折來頻動故園思

憶京山大陽寺

往歲侍先  
大夫曾遊

往歲曾遊大陽寺倚天樓殿碧參差明安菴迥峰巒古



楊廣城高逕路危，滿壑松聲僧定處。  
一堂秋雨客談時，如今細想經行地。  
三復遺詩血淚垂。

行建溪上見拏舟上水者愴然傷懷

何人刺船上寒水，却意避地微江時。  
驚濤澎湃慈親懼，鼓棹紛紜稚子嬉。  
漫漫平沙煙上早，溟溟簧竹月生遲。  
感舊將為仰天哭，恐驚行路祗成詩。

春日郊行

曉尋山寺出重城，壞壁誰題半草行。  
照眼芳菲空玉友。

並湖風物記金明新詩已見成敲鉢舊賞懸知又棄繁  
龍井海棠須靳惜一樽留取聽鶯鳴

屏迹

荒村屏迹任時移山水昏明各異姿  
穹谷煙凝成襍積斜林風過作鱗差  
病身豈復能強健末路惟應足抵巇  
萬古升沉同鳥沒蓋棺猶未且題詩

泛舟觀雨

雲氣交流晝窈冥疾風吹雨雜荷聲  
山隨明晦姿橫出

舟入渺茫詩漸成  
託迹江湖三畝足  
放懷天地一身輕  
銜盃不用嗟羈寓  
未必乘槎勝此行

次韻王亞之沿湖冒雨歸

禽鳴滑滑濺泥塗  
賴有雲巢眼不孤  
天外黑風迷鷺嶺  
檻前流水憶鵝湖  
躋攀危磴九折坂  
捧玩新詩百斛珠  
收拾殘紅付春去  
四時光景任三無

芍藥

青春愛謝日遲遲  
正是羣芳掃跡時  
濃露有情融睡臉

暄風無力困豐肌，苦將蕊氣相牽引。  
若對華燈不自持，應似西江明夜火。  
館娃宮裏醉西施。

龍洞

靈洞何年水亂流，試尋危棧訪丹丘。  
此時景物迷三島，當日神龍跨九州。  
白晝瀑流方訝雨，炎天嵐氣忽驚秋。  
憧憧門外紅塵路，過客何人肯暫留。

自鉛山如鵝湖

長松十里曉冥冥，行盡松林到法城。  
悄悄虛廊無客語。

陰陰衆綠有鶯聲  
新荷萬點土花碧  
白鷺一行春雪輕  
麥秀漸漸桑葉暗  
恍然如在故園行

九日

南國窮秋冷尚賒  
隨時遊曠自堪嘉  
且欣一雨山爭出  
休歎重陽菊未華  
佳客逢秋宜得句  
道人酌酒似烹茶  
人生勝日須行樂  
豫去昏鴉作陣斜

登高未用懷鄭縣  
少異誰能識孟嘉  
歲歲青罇常有酒  
年年黃菊未逢花  
分將默坐更搜句  
肯以銜盃當飲茶

且莫憑欄傷極目人間秋日易西斜

九日當年菊蕊遲今年庭下半芳菲未收原野將成廩  
楓落江湖欲授衣何處好山饒勝槩擬攜家釀趁晴暉  
病衰不復能搜句聊插紅萸滿帽歸

夏養真父挽詞

四十青春鬢未皤翻如槁謝葉辭柯親闈有綵今難戲  
客館無魚尚有歌遺愛偏存梅渚畔新塋空占闔山阿  
素車不得親觴酌別望含悲獨奈何

忠顯劉公挽詩四首

活人憂國見平生  
晚節臨危志益明  
漢仗塵深遠宮闕  
羶裘風急半公卿  
千人致詔竟不起  
萬戶封侯却似烹  
暮晉朝梁真可忍  
紛紛螻蟻尚偷生

旣基媒孽自燕雲  
抗議如公有幾人  
軍旅未聞焉用試  
豺狼不噬豈宜親  
求魚緣木謾蠹國  
曲突徙薪翻殞身  
才大言深古難用  
忠良千載恨常新

自從玉帛交殊域  
一見寒盟為隱憂  
亂相方虞鄰國難

廟堂誰聽徒薪謀義如杞殖仍忠壯識比申胥不怨尤  
松柏蕭蕭九原路高名常共建溪流

抗論中朝猶在耳鳴弓仇敵已臨城王都竟失金湯固  
朝士方貪雀鼠生慷慨一朝先奮節華戎終古共知名  
可惜千官臣偽後蕭蕭華髮盡垂纓

哭孫信道并序

信道名確沈晦榜擢甲科建炎初作京西運司屬官  
蔬食破裘晏如也山中抄書無慮數千卷今不幸改京



秩死年止四十嗚呼天之生才而顧使之賫志泉壤哉  
悲君刻意異時流十載經春著敝裘新隴預知成馬鬣  
舊書何苦似蠅頭孟郊骨相終齋志賈誼才能竟不侯  
寂寞聲名千古事定知無益夜臺幽

挽張全真詩二首

辱遇本非因紹介登門不謂便無期傾心問及言猶在  
投贄書成事已悲作鎮方甘建鄴水惜賢尤在中興時  
傷心無復諮疑事還似當年徐孺碑

紹興丙辰見公知  
待特異及公再作

參領在建康時數造門禮遇益洽然平日未嘗通書問  
去秋舍弟過建康再三見問方欲以書道悃悃而公計  
至矣又昨於方務德處見公書使  
街車載齋事未知所出末句故云

玉質清臞似列仙人間亦合得長年功名不竟如壺遂

謂不作宰相

冲淡空嗟似樂天

常子正嘗云公質性恬淡閒居有園林蕭散之適可比樂

天

胡不慙遺緣國老憂深殄瘁為時賢含毫誰作名臣

傳要使風流後世傳

七言排律

壽王蘇州

維昔高堂講射蓬瑞雲吹不散薰風十分正滿冰輪桂  
一葉將飛露井桐元老三朝尊相闕餘休幾世積陰功  
光芒孕秀星淪昴神物儲祥嶽降嵩淮水筮靈芳裔遠  
蜀江波與慶源通傳家自有調元手許國常輸露膽忠  
節勁不凋霜後柏氣豪長吐雨餘虹金隄護掃河循道  
蘭省分曹宿在穹銅虎屢揚飛蓋皂木牛多足太倉紅  
朝班入筮鷓鴻列京尹頻令狴犴空暫綴漢庭安世橐  
來臨吳國館娃宮民安泰伯封疆外日在韋侯嘯詠中

贊壽一爐金篆籀捧觴千髻玉玲瓏桃開坐閱三千歲  
松夢當占十八公日望鋒車歌九罌時韜組甲詠車攻  
如君江左今王導有客河陽舊石洪甄冶從來收朽鈍  
涓埃殊未報深崇省臺袞袞心何羨旌旆搖搖思莫窮  
賓綴阻陪稱壽筭書緘聊復寄詩筒西湖十里荷花水  
淨洗觥船遠祝翁

壽沃令二首

山秀江清號浙西氣鍾賢哲誕生時商朝月正垂三統

堯殿莫茲見七枝此景聚水藏北陸有人眉壽壽等南箕  
教條宰邑郊馴雉道引支床室有龜五百間聞喬獄降  
八千遐歷大椿期書生願效封人祝為捧黃金一屈卮  
奎文昭煥夢熊羆正值英賢慶誕時人日空知經月是  
斗杓纔徧一年移銅靈仙氣鍾標格罨畫溪光入句辭  
發策談兵知醞籍操刀製錦見施為三年仁政春千日  
萬口歡聲壽一卮願祝我翁何許歲紅蓮葉上見遊龜

和李少卿

獨見涼蟾欲上時  
西園爽氣溢清池  
坐欣萬頃潮方滿  
欲舉一杯誰與持  
虛閣排雲空窈窕  
青山繞郭自參差  
氣澄象表輪踰迥  
光泛高林影驟移  
一歲佳時今鷺過  
誰家橫笛未休吹  
城烏何事翻飛急  
不學鷓鴣占一枝

五言絕句

懷伊亭

回環擁岡巖澗漫  
分林塢縱日以怡情  
信美疑吾土

松門

長林上晚煙明月曜  
深夜重閉豈吾心  
自回俗士駕  
致爽亭二首

霧豁空江平林疎  
遠山出龍溪夜來雨  
爽氣侵衣濕  
桑柘落洲渚澄潭  
漁艇集幽禽忽飛來  
斜日水光溢

宿歸仁寺

下瞰十仞餘遙瞻幾  
千里遊客日暮時  
鄉心萬端起  
喬林衆鳥集暮氣  
氤氳上好在三巴  
山何時正相望  
巴水任喧雲僧牕  
睡方悄風清月到  
床露白蟲鳴草

幽居

避地依荒谷，衡茅苟自安。  
門前山四塞，不用買峯巒。

觀月出

山空樵唱稀，林昏歸鳥沒。  
新月含煙霏，遙依亂峯出。

生口

陸路去縣十五里

牽舟四日程，屈曲縈山轉。  
行行問居人，始知猶近縣。

信美亭二首

北眺逼山樊，南瞻近津許。  
登茲一消憂，信美仍吾土。



躡屐上危岑策杖臨孤嶼來往自忘疲於此時延佇

柳陌

含風皆有態夾路自成行馴鴉朝暮集接葉得深藏

詠種菊

手種籬邊菊秋來亦自開驚蝶翩翩舞雄蜂去復來

懷新亭四首

遠意在田疇中園結茅屋凍雨昨夜來共欣春水足

耘耔競所務喬林午風清嘉穀雨來長復茲畦水平

恢台當長夏山木盡成陰良苗方競茂悠哉林下心  
晚秧紛已及中田日往還適與好風會植杖觀前山

夜雨

夜半山雨來夢覺還復息寥寥簷溜空時聞斷續滴  
與陳去非夏致宏孫信道遊南澗同賦四首

策杖南澗邊菖蒲如綠髮石亂水流分山空鳥聲歇  
山桃深復淺亂發傍幽巖無人慰寂寞晴日自穆穆  
共坐石上苔坐久溪陰轉峯外晚林稠山腹晴雲散

三日山中遊溪山未全究却羨畬田人春晴斷煙岫

聽微水有感四首

發源由太古東逝幾朝昏欲識無窮意當看石上痕  
寒江流不極疊浪日沄沄詎是悲鳴苦端由清夜聞  
西從徼外來東去還歸海徒聞朝暮聲詎識年華改  
祇應初剖判便有斯江水于今知幾時東流猶瀾瀾

邵公泉

遺愛在斯土諒如泉山滋居人不敢唾時復照鬢眉

陰陰勿翦棠聽訟得處所滾滾山下泉飛空作甘雨

題畫扇

蒼藹前林暗遙知暮氣生漸向山門近應聞鐘已鳴  
望望滄波濶汪汪灣湖水秋津亭方遲客遠來何處舟

宿永睦將口香積院滿山皆松檜聲

雲峯幾萬疊何處見家山此日無窮意悠然獨倚欄  
萬壑樹色斂松門已暮鐘故園腸斷客應與此時同

獨夜

山月娟娟靜山煙漠漠輕茅簷無一事獨聽夜江聲

晚晴

前山收苦霧宿鳥有新聲萬里南天客三冬此日晴

下馬橋

悠悠望深松置馬長路側豈為服堇言良以尊舊德

泊舟

夜光沉千嶺寒星動一川汀沙霜似雪寂寂繫江船

盡山亭

南嶺與北岑千峯萬峯起木末置危亭衆山窮表裏

出峽

牽舟已出峽何旦復當還蒲溪應漸近已見宋平山

溪上行

垂陰覆綠波檀欒影空注傍有微徑通穿雲向何處

出見桃花盛開

青林擁蕭寺况乃在山陰出見桃花發方知春已深

渡湘水

昔讀此離騷今朝渡湘水荒草滿秋原何處尋芳芷

歸仁縣石堠

縣廢不知年無人問遺址石堠猶路傍故物應唯此

采薇洞

春曉山路永行行歌采薇歌長非有意惟以療朝飢

七言絕句

元日

推頽那覺是華年城郭衣冠競彩鮮寒雨連天無事出

卧聽簷溜似山泉

至梅堂次韻

牛衣不煖夢初回  
聲切嚴城角弄梅  
旋理敝裘驂蹇足  
披霜得箇為公來

次韻王得之遊淨明題易安二絕

滿院嵐光滴翠寒  
望湖莫羨十三間  
門前石上蒼苔跡  
數得人蹤到與還

銅駝陌上須臾樂  
金穴侯家瞬息懽  
爭似蓋頭茅一把



老僧終日百般安

又次韻五首

建溪南去自悠悠  
溪上愁思逐水流  
欲寄平安數行字  
秋鴻飛不到炎州

離尤南去本無因  
陰隲忠嘉自有神  
敵國猶強讒間露  
君王宵旰憶良臣

行盡炎荒路向東  
蠻村戍鼓夜逢逢  
惜無王朔同登望  
騎氣應須似白虹

行衣葉葉馬蕭蕭快意寧知歸路遙海上尖峯青似染  
却從雲外望岩堯

心知公及暮春歸猶自思公腸九回門外春流已如黛  
行看飛騎過橋來

言菊

中秋是處已揚芳籬下朝來欲破黃賴得雨荒兼早沒  
却能應候作重陽